

CHE SI TIRIN DE BANDE E CHE NUS LASSIN TIRÂ FLÂT

Al rive il gnûf an e o sin ca a spietâlu cul cûr ingropât e il flât ingusît. Al scomence un mieç secul e Diu nus vuardi a pensâ che al ves di jessi compagn di chel mieç che o vin passât: Diu nus vuardi par nô e pai nestrîs fiis che lu varan di vivi. Il Nûfcent al è nassût sot la bandiere dal spirt nazionâl: plen di patriis pusticis, plen di smanie colonialistiche, plen di retoriche tartarine. La biade Europe si è scolade di flât a tirâ sù murajons di confins tra une "patrie" e chê altre e a cirî di sburtâju in là. Ogni "patrie" e à volût slargjâ il so strop, e si à nome insanganade lis mans. E ancjemò i anzians, cressûts in cheste clime, a sbilfin parcè che la plui part dai zovins no si scjaldin il lat pe idee nazionâl. Cun chei risultâts che a son vignûts fûr! Il Nûfcent al è nassût ancje sot la bandiere des "rivendicazions dal proletariât". A saran ancje justis, ma come che a son stadis manovradis e come che si manovrin in zornade di vuê, al è dome di sgrisulâsi. Une volte si scombateve pe paie, cumò si contint par un fregul di lavôr, che lu pain cemût che a vuelin. Ma nus àn jempladis lis orellis di grandis peraulis e lis sachetis di lunaris!

Ce maravee che si vebi pierdude la fede in chestis idealitâts dal mieç secul plui neri che la storie e vebi mai regjistrât! La fede, ma no la pôre: parcè che i parons e i socestants, ancje se no son bogns di disgredeâ une ace, a son simpri inte pussibilitât di ingredeant di altris: come un miedi, che ancje se nol sa vuarî une fierisine, al à simpri il mieç di mandâ un grum di int a fâ tiere di bocâi.

Dai socestants vizins e lontans, no vin fede, ma o vin pôre; la esperience nus à distudade la prime e dismote la seconde. Che nus comandin in non de "patrie", che nus comandin in non di une civiltât, che nus comandin in non di un partît, no crodìn a nuie o vin pôre di dut: de lôr insipience o de lôr disonestât, de lôr gramule o dal lôr fanatisme: pôre plui di dut, de lôr pôre!

Almancul che si tirassin de bande: che nus lassassin tirâ flât, che nus lassassin distrigâsi di bessôi in chês rognis che o podressin russâsi di bessôi. Nancje par impens! Simpri plui a strent nus vuelin peâts daprûf de lôr barache; simpri plui curte a vuelin che sei la cjadene che nus ten saldâts ai lôr interès; simpri plui fuart il laç che nus tire daûr di chei che no ur crodin.

Cun cheste pene e cun cheste teme o stin a cjalâ il gnûf an che al nas daûr di un tabâr di nûl.

josef marchet - Patrie dal Friûl / Zenâr 1951